



Schnitzulbank 2006

Fasnachtsgesellschaft Muotathal

Guät Tag midänand lär liäbä Lüt
liär sind üs härzlich willkommä hüt
all wettid wieder wüssä was ds letscht Jahr isch laufä
das cha jedä vernäh, wännr tüäd ä Schnitzulbank chaufä

Wänn einä scho dr Wäg i das Blettli duät gfindä
dä muässr wägä dem nu wiitniänä afä spinnä
da drinä nämmr jedä ischr gross odr chlii
isch im Ried vor odr im Bisisthal innä gsii

Färä hed z Milchauto einisch gha ä Pannä
duä sind Buurä id Hütä mit ihrnä Channä
bi eim häts duä nu ächli Zuäschlag söllä gäh
sii Milch hed abr susch ä keinä wellä näh

Äs isch gsii bim Fründschaftsschiässä im Bisisthal
det isch einä gad schön bsoffnä gsii im fahl
nach zwee Probe hedr wieder müässä ufstah
bim Mal druf hedr duä ohni müässä ahfah

Andacht hend nüd all idr Chilä
da muäsmä schwätzä, lachä und umäschilä
äu Händy hends bihnä di gwüssnä Frauä
vos hed afä juutzä, hendsäsi äu afä gschauä

Im Pub gahts hiänta änu ächli zuä
zwei Dämli hend det gäh nüd ghörig Ruä
einersmal sind diä anänand hii
äs sind behd gad schön vrchräblät gsii

Ihruckä tüänd ä nüd all gliich gärä
passiärt isch das a zwee Jungä färä
sie heigid schiins nümmä drah dänkt
wägä dem hents ja nu keinä ufghänkt

Z Trölägä obä isch ä Chäsärii
diä wettid au im Guinnessbuäch innä sii
der gross Chäs hät äso schiär nüd Platz imä Turnischer
ga hälfä lihmä ischä dr Chäsminischer

Hüt zu Tags ärlights nur me 0.5 Promill
äs chas scho öppä gäh, das einä meh will
im Wernisbärg hedr wellä adr Polizii drvoh
sie sindum duä mäni gliich nu einisch vrkoh

Äu im Ried gahd alig z Wild übr d Schtrass
drumm söttmä det fahrä nüd äso rahss
einä heds breicht midumä Totalschadä
dr Wildhüätr hed duä gliich nu müässä nachäladä

Äu z Tele Tell isch färä gsii bi üs im Thal
ä sexuelli Umfrag hend diä duä gmacht, im fahl
uf dr Schtrass hendsi gfragt zwee ufklärting Frauä
am Abäd hedmäs duä im Färnseh nu chönnä gschauä

Äs Hündli isch gsii ufs Nachburs Platz
anä gschissä heds det ä schönä Flatz
ga zämä näh hed ä Ding ä keinä wellä
dr Haltr heds duä uf dr Therassä obä chönnä zellä

Im Radio Central machids alig hiänta äs Quiss
am Draht hends ghah usum Thal usä ä Miss
we viel Ihwohner hed d Schwyz, hends gfragt am Telefon
gantwortät hed diä Frau mit 200 Million

Vom Hochwassr färä müässmä änu öppis vrzellä
d' Muotah hätt nu glii drübr usä wellä
einä hed adr Fürwehr äs Bänkli zur Vrfüägig gschteilt
wäg denä paar Chräbäli heigr nu ä Rächnig gschteilt

Einä hed äs Fuädr Mischd uf d Wissäwand ufä tah
a siim Hochsig hed ä Kolleg ä bsundärä Ihfall ghah
är hedum das Fuädr wiedr is Ried apä gnuu
äsoo hed ä Hochsignacht ä bsundärä Guh

Üsi Buurä hend susch usinnig schöns Veh
das chamä all Jahr am Vehmärght gseh
we mängs as bringid wird susch alig ufgschribä
einä hed duä gliich nu äs lätzes hei tribä

Ä jungi Damä isch z Villgau obä gsii übrnacht
uf dem Kanäbe isch härbi gangä äs isch ä wahri Pracht
nach dem Liäbäsackd hedsi z Natel nümme ghah
sie hed do nu einisch dörfä ufä gah

Wo isch mi Rucksack fragt der Maa
är hed scho äs bitzäli trunkä ghah
der hends miär gschtolä, ja bimeid
drbii hedärä eistr umä treid

Amä wiissä Sunntig wiä chönnts äu andersch sii
isch der guät Wirt wiedr einisch bsoffnä gsii
das all 80 ihri Menü hend chönnä gniässä
hed duä ä andärä dörfä idr Chuchi umäschlässä

Dr Jodelklub isch gsii amä Jodlerfäscht
det hend gläbi nüd all gliich früäh wellä is Näscht
zwee hend duä nu wellä midum Taxi hei
abr ohni Gäld, seid ä jedä Schofför nei

Äu färä heds Fäschtr ghah idr Mehrzwäckhallä
diä hend gläbi adä meischtä rächt guät gfallä
eini hed a eim nu äs Auto klaut
z letscht hedsi nu ä Umfall baut

Uf Öschtrich usä isch ä jungä Maa
är hed si 40ger Justi wellä binum hah
das isch ja nüd äs Auto wo weiss nüd wiä rännt
drumm hendsums bis a Gränzä usä gmännt

Ä Bisisthaler hed d Schaf im Schwarzäbach obä
är hed Chummr, si tägids am 1. Augschtä schiär z hüntsch rodä
är hed alli im Namittag ussä greicht
äsoh heds ä kä Ragehtä preicht

Plagiärt hed innärä Beiz ä Pänsonischt
är hed dütli zeigt, we riichä das är ischt
gad drii hunderter Notä hedr gleid ufä Tisch
schämter sie ächt, dasr niäme zuächä isch

Tschuhter hend färä ä Usflug gmacht
det isch fiahtig trunkä wordä und au glacht
einä hed z Fideelsii ächli überrissä
är hed duä näbäts Bett apä gschissä

Dr Nüübuu vom Altersheim hed färä au gäh z redä
det gschaffäd hät gläbi dr liäbscht schiär jedä
dr Spahtästich isch ja idr Ziitig gsii
hätt ächt dr Baggerfüährer mittä Föhtschä grad wellä drahi

Einä hät am Kolleg söllä äs Bett entsorgä
der hed abr siis äü zwenig vrborgä
disä hed duä ächli behdi midum hei
vos dr Kolleg gmerkt hed, sinds halt scho gsii entzwei

Imänä Solarium cha einä bruunä wärdä
wänns di vrbrännt bruchsch Essigsuuridonärdä
zerscht hedr öppis müässä zämä schlah
dasr wieder hed chönnä drsusä gah

D Riedter Schützä träffid eistr nu gar nüd schlächt
das isch det vor abr nüd a allnä rächt
Unterschriftä sammlä gäg das Tätsch täg ä Frau
öbsi dä Ärfolg hed, weissmä nu nüd genau

Idr Bruunalpälischöchi isch änu öppis passiärt
det hed einä gad schön posiärt
nüd nur d Müskäli heigid sich det gweigt
är hed duä z letscht änu z Füdlä zeigt

Zwee Damä sind im Usgang gsii z Schwyz
sie hend gwüsst, z Heiriitä ährlihts
ä Carschofför hends gfragt öbr sii däg hei
gfahrä isch är mit denä zwee Muättrgottsseelä äläi

Idr Widmä isch passiärt bimänä Fuässballspiel
we immr isch au det ächli Gäld im Spiel
einersmahl hed einä ghah usinnig Hitzä
är hed duä müässä übärä Platz durä flitzä

Uf dr Hochjagd isch äs gsii, oh Herr jee
einä hed det gad viär Hirschli gseh
d' Jagdkollegä hedr ufbottä und zwar gschwind
vos tribä hend, hends gseh das nur Rehli sind

Arbät gid äso ä Schnitzulbank z' dichtä
d' Lüüt wüssid drnah au eh öppis z brichtä
idr Fasnacht söttmä äs Gschpässli ärliidä
suscht tuädmä um beschtä dähäimä bliibä

Soo, ich glaubä äs täts jetzt wieder fürnäs Jahr
das wo miär gseid hend isch meh odr mindr wahr
wänn einä meint är chöns bessr bringä
dä chanär z nächscht Jahr ä ga hälfä singä